

■ REGENZA

En vacanze meritadas

(anr/gc) Era quest onn è la dumonda – gist avant il temp da vacanzas – stada l'usitada: Ins ha vuli savair, nua che noss regents passentan lur vacanzas meritadas – suenter in onn da blera lavur ed ina intensiva campagna electorala. Ier, tar il davos inscunter dal guvern cun ils represchentants da las medias avant la vacanzas, han ils commembers dà enconuscent lur plans.

Il parsura da la Regenza, cuss. gov. Mario Cavigelli, resta insaquants dis a chasa, per alura sa render giu la Puglia (Italia) e pli tard en il Tessin.

Era cuss. gov. Martin Jäger tiri vers il sid, numnadaman sin l'insla Ischia.

Pli lunsch va cuss. gov. Christian Rathgeb, numnadaman a Teneriffa

(Inslas Canarias) e concluda las vacanzas si d'acla.

Anc na dal tut cler èsi tge che cuss. gov. Barbara Janom Steiner interprenda en la vacanzas. Quai vegnia decidì a curt termin. I possa esser ch'ins gaja a la mar ni sin ina cruschada.

Pil pli sa splegan las vacanzas da cuss. gov. Hansjörg Trachsel enturn chasa. Mo la Festa federala saja el a Frankfurt insaquants dis.

Mintgacas è la Regenza, che ha vacanzas il medem mument, cuntanschibla da tut temp sur la chanzlia chantunala.

Quai e tschai

Pertutgant il vegl problem cun la resgia gronda a Domat duessi curren insatge. La

vischnanca da Domat ha dumandà d'instradar ina «maisa radunda» en chaussa. Il guvern è persuerter ed ins saja vid tschertgar in termin per s'entupar.

Vid la «Exposiziun mundiala» 2015 a Milaun vegn – sper auters chantuns vischins – era il Grischun a sa participar cun la summa da ca. 2 milliuns francs. Ins haja numnà internamain in manader per quest project.

En connex cun il Center da cumpra Outlet a Landquart, spertgian ins tge che Berna decidia en chaussa a basa dad ina intervenziun parlamentara. Enconuscentamain ha la Dretgira federala scumandà la vendita la dumengia en quai center, dentant anc betg il chantun Grischun.

■ FORUM DA VOTAZIUNS

GIE al referendum encunter la refuorma territoriala

Il cantun Grischun ei multifars en differents secturs, aschia ha el denter auter differents lungatgs, differents culturas, historias e buc il davos differents purschidas da formaziun. Dapi igl 1. da schaner 2011 ei la Regiun Surselva purtada da differents scolas. Quellas ha ella uniu sut il tetg dil Center da formaziun Surselva. Oz s'audan la scola da musica, il Survetsch logopedic, la scola vinavon, la scola professiunala industrial e commerciala, la scola media mercantila e propedeutica, la scola me cantila dil di e sin fundament dalla decisiun dil parlament regiunal dils 20 da zercladur 2014 era la promoziun da special talentai leutier. En emprema lingia ha la Regiun Surselva surpriu quellas scolas per rinforzar e segirar la purschida da formaziun ella Surselva. Quellas purschidas han egl avegnir buca mo da cumbatter cun il svilup demographic, mobein sin fundament dalla refuorma da territori era cun schicanas birocraticas supplementaras. Quei sa buc esser la dretga via.

Tenor la refuorma territoriala vegn il parlament regiunal dalla Surselva remplazzaus entras ina conferenza dils presidents. Ils pensums actuals dalla Regiun Surselva ch'ei vegni surpri el decuors dils davos onns e che vegnan buca reglai sin scalem cantunal respectivamein delegai allas regiuns, ston vegnir francai ellas novas statutas dalla regiun. Quei ei negina differenza decisiva tier la structura actuala. Ein ils pensums inaga francai ellas statutas ed aschia era approbai dalla conferenza

dils presidents, entscheiva el futur denton la part heiclia e la lavur – definir las cunvegns da prestaziun cun mintga vischnanca.

Mintga vischnanca dalla Regiun ha lu aunc inagada la pusseivladad da decider schebein ella accepta la cunvegna. Sch'entginas vischnancas sutscrivan buca la cunvegna sto l'entira finanziaziun vegnir examinada danovamein ed ei sa esser ch'in pensum sa buca pli vegnir realisau per consequenza dallas contribuziuns muncontas. La consequenza savess allura esser che vischnancas pintgas e mesaunas savessen buca dumandar, respectivamein porscher differents survetschs. Co duess ei aunc esser pusseivel da planisar cun quellas structures birocraticas sch'ins fa persenn che las cunvegns san praticamein vegnir visadas mintg'onn a moda unilaterala dallas vischnancas? Co duessen strategias vegnir elavuradas per il futur? Co sa la finanziaziun vegnir garantida? Co savein nus garantir che la nova generaziun sa el futur profitar dad ina buna purschida da formaziun sche neginas strategias e visions san pli vegnir elaboradas sin fundament dalla malsegirtad?

Per quels motifs: GIE al referendum encunter la refuorma territoriala per che nus stettien era el futur habels d'agir e che nosa purschida da formaziun en Surselva vegni buc supplementaramein periclitada entras schicanas birocraticas.

Curdin Tuor, meinafatschenta dil Center da formaziun Surselva

■ NOVITADS WWW.RTR.CH

Traffic sin via chaschuna ils pli blers custs

Il traffic en Svizra ha chaschunà il 2010 custs da passa 9 milliardas francs per la publicitad, quai sa resulta d'in studi fatga per incumbensa da la confederaziun. Bunamain otg da las passa nov milliardas francs van sin il quint dal traffic sin via. Per quai dettia duas raschuns: Per l'ina dettia sin las vias il pli bler traffic e per l'autra sajan las emissiuns da las substanzas nuschaivlas ed ils ristgs d'accidents pli auts. Meglier che per il traffic sin via vesa la bilantscha ora tar il traffic da viafier. Qua giaschevan ils custs externs tar radund 700 milliuns francs.

Na ad ina taxa da transit per tunnel dal Gottard

Per ir tras il tunnel dal Gottard na duain ins betg stuvaire pajar ina taxa. La cumissiun da traffic dal cussegl naziunal è cunter ina taxa da transit en connex cun la sanaziun e la fabrica dal segund tunnel dal Gottard. La cumissiun da traffic ha ditg na a la taxa cun 17 cunter 4 vuschs e trais abstenziuns. Ina taxa da tunnel na fissia betg cumpatibla cun la costituziun. Tenor quella èn las vias publicas libras da taxas. A la construcziun dal segund tunnel per sanar il tunnel existent aveva la cumissiun gia ditg gea il mars.

Tur da Roche - Unia renfatscha dumping da pajas

Durant fabricar la tur giganta dal concern da farma Roche a Basilea duai avair dà plirs cas da dumping da pajas, quai tenor il sindicat Unia. Pertutgads dal dumping da pajais sajan lavurants d'ina interpresa polacca ch'è sa specialisada sin la construcziun da fatschadas. Ils lavurants sajan vegnids cugliunads per passa 1 miliun francs, scriva Unia. Quai saja il pli grond cas da dumping da pajas en Svizra fin oz. Las lavurs sin il plazal da bajegiar ha l'Unia laschè interrumpir.

Regalai Voss messadis da WhatsApp™ a la scienza!

Gudagnai super viadis!

What's up, Switzerland?



www.whatsup-switzerland.ch

Linguists da las universitads da Berna, Turitg e Neuchâtel vulessan intercurir co ch'ins communitgescha per WhatsApp™ en Svizra.

Visitai www.whatsup-switzerland.ch per vegnir savair:

- co ch'ins po regalar messadis da WhatsApp™
- co che nus protegiam Vossas datas
- tge premis ch'ins po gudagnar